



INICIJATIVA ZA OČUVANJE HOTELA INTERNACIONAL U ZENICI

Poštovani,

Vijeće Univerziteta u Sarajevu - Arhitektonskog fakulteta, na prijedlog svojih članova, na sjednici održanoj 06.10.2025. godine, razmatralo je najavljene planove rekonstrukcije i dogradnje Hotela Internacional u Zenici i Odlukom br. 04-01-1259/3-25, podržalo prijedlog pisma, a povodom planiranih intervencija na Hotelu Internacional u Zenici, kako slijedi:

- Prema informacijama objavljenim u medijima (portal Klix.ba, 16.09.2025.), planirane intervencije predviđaju promjene koje bi izmijenile objekat do neprepoznatljivost, kako u unutrašnjem prostoru, tako i u njegovom vanjskom izgledu. Dodatno, najavljene dogradnje i nadogradnje nisu u skladu s važećom planskom dokumentacijom, što otvara ozbiljna pitanja urbanističke i zakonske utemeljenosti takvih poteza.
- Hotel Internacional je djelo arhitekta Slobodana Jovandića, dobitnika "Borbine nagrade" za arhitekturu (1987.). Ovaj objekat nije samo arhitektonska cjelina, nego i simbol modernističkog razvoja Zenice, te svjedočanstvo jedne epohe u kojoj su oblikovani identitet i urbani karakter grada.
- Smatramo da je od izuzetne važnosti da se obnova Hotela Internacional provede na način koji će u najvećoj mogućoj mjeri poštovati njegov izvorni oblik, identitet i arhitektonske vrijednosti, kako unutrašnjosti, tako i eksterijera, spriječiti sve pokušaje dogradnje i nadogradnje koji bi narušili integritet i prepoznatljivost ovog značajnog modernističkog objekta.
- Uvjereni smo da bi svaka intervencija kojom se poništava ili umanjuje izvorna vrijednost Hotela Internacional značila nenadoknativ gubitak za arhitektonsko i kulturno naslijeđe Zenice i Bosne i Hercegovine u cjelini. Stoga apelujemo na Gradsku upravu Zenice da, u okviru svojih nadležnosti, osigura da proces obnove bude usklađen sa stručnim i zakonskim standardima zaštite modernističke arhitekture.

U nadi da dijelimo zajednički interes očuvanja identiteta i kulturnog kontinuiteta Zenice, stojimo vam na raspolaganju za svaku stručnu konsultaciju i saradnju.

S poštovanjem,

Univerzitet u Sarajevu – Arhitektonski fakultet